

## **Bummelbangg 2026**

### **Markus sucht Dambuuren**

Dr Markus isch am Fasnachtzyschtig ganz ellei  
Kei Tambuur will mit ihm ystoo, nid ei Bei  
Au Kirsibuebe chönne leider, au nid cho  
Und dr Carly und Walti, muen ins Klybasel übere goo

Do mäldet sich Trummelschuel vom Claudio, oh dä Schatz  
Es chöme e paar Tambuure, uffe Münsterplatz  
Mit 20 Tambuure, het das alles übertroffe  
Denn isch dr Markus, Freudig in Steine abe gloffe

Es lüetet s'Händy bim Markus, är isch am zittere  
är fürchtet Stress, und duet öbbis wittere  
Die Zämegwürflete, mit Dambuure oder oni  
Das wüsse si, am Telefon meischtens noni

Dr nägscht Termin vo allne Gruppe, isch vorem Schnabel  
Dr Markus erwartet, 30 Dambuure und Pfiffer variabel  
Noch langem warte, fähle immer no zwei  
Dr Markus, isch doch lieber am Zyschtig ellei

Dr Charly het beduure und goot uff Pirsch, ganz still  
Und frogt jedi Drummle, ob si nid zu uns will  
Mitere Damburin chunnt är zruugg vo dr Jagd, ganz geil  
Und prostet zum Markus, und seit Weidmanns Heil

Dr Carly het e begabig zum Tambuure finde  
Es isch si Thai lächle, do chunnt sogar e Lahme oder Blinde  
Do seit dr Charly, aber denn ganzforsch  
Behandelt die Perle, besser als dr Jöggi und dr Georges

## **Latärneverabschiedig am Mittwoch zobe**

Latärne verabschiede das Joor, wie sell das goo  
Vorem Kornhüsli sait dr Markus ändlig, Ystoo es goot esoo  
Dr Kari schart scho, und nimmt die Teichsle glyy  
Und dr Kutscher Martin, hoggt denn hinte dryy

Im Kari isch s Latärnewägeli, scho lang im Wäg  
Aber hütt isch är, voller Energie und zwäg  
Aer zieht das Wägeli dure Heuberg, e Ochs isch los  
Zu de Naselöcher, dampft das use ganz famos

Dr Kari zieht wie e Ochs, alli sind ganz barsch  
Alli Stägglätärne und Fassade am Heubärg, sind am Arsch  
Bim Leonhardskirchplatz chunnt dä Waage ändlig zum stoo  
Mit bluetigem Kopf, stooht Wägeliteam jetzt doo

Mir vom Spiel laufe verstört zugg, bis zur Harmonie  
S'Latärnewägeli denn au, aber hundert Meter hintetrii  
Bim Rosshof seit dr Markus, hüt laufte gar nid rund  
Denn die Zämegwfürlate, warte scho e halbi Stund

Dr Latärnewaage isch denn cho, kaputt und matt  
D Latärne verabschiedig, findet doch noo statt  
Gebäudeversicherig schriebe, es duet ihne Leid es isch wohr  
Nid Gliggechäller, aber D' Ochse sind die grossi Gfohr

Dr Kutscher Martin het näbem Schade sich gross blamiert  
Dr Martin seit, jetzt wird dä Ochs ändlig kastriert  
In Marokko, isch dr Ali billig und vom Fach  
Bi de Kamel, isch das nämmlig gar kei Sach

## **Schluss**

Ich bi am Schluss vo mim Bummelbangg

Ich sag dr Dania und Andy, jetzt scho unsere Dangg

No e schöne Bummelsunntig dä empfyhli

Sali zäme als Singvogel, und nid als Kaffimyhli